

## 開放文學 – 歷代筆記 – 廣東新語 自序

《廣東新語》一書，何為而作也。屈子曰：「予嘗游於西方，閱覽博物之君子，多就予而問焉。予舉廣東十郡所見所聞，平昔識之於己者，悉與之語。語既多，茫無端緒，因詮次之而成書也。或曰：「子所言止於父母之邦，不過一鄉一國，其語為小。予曰：不然。今夫言天者，言其昭昭，而其無窮見矣。言地者，言其一撮土，而其廣厚見矣。言山言水者，言其一卷石，言其一勺，而其廣大與不測見矣。夫無窮不在無窮，而在昭昭。廣厚不在廣厚，而在一撮土。廣大不在廣大，而在一卷石。不測不在不測，而在一勺。故曰：語小，天不莫能破焉。夫道無小大，大而天下，小如一鄉一國，有不語，語則無小不大。然而何以「新」為名也。曰：吾聞之君子知新，吾於《廣東通志》，略其舊而新是詳，舊十三而新十七，故曰《新語》。《國語》為《春秋外傳》，《世說》為《晉書》外史，是書則廣東之外志也。不出乎廣東之內，而有以見夫廣東之外。雖廣東之外志，而廣大精微，可以範圍天下而不過。知言之君子，必不徒以為可補《交廣春秋》與《南裔異物志》之闕也。書成，自《天語》至於《怪語》，凡為二十八卷，中間未盡雅馴，則嗜奇尚異之失，予之過也。番禺屈大均翁山撰。